

**Naqqiut**

Siunnersuut 27. maj 2019-imeersoq taarserpaa  
(Pingaartumik Naalakkersuisut aamma Illersornissamat Ministerip akornanni tunngaviusumik  
isumaqatigiissusiortoqarnera tunngavigalugu akissuteqaat iluarsineqarpoq.)

**Kangerlussuaq ingerlaannartillugu illersornissaqarfimmiit atorneqarnissaanik  
kissaateqartoqarneranut atatillugu paasissutissat nutaat tunngaviusinnaanersut  
mittarfeqarfiliornissamat nunallu attaveqaqatigiinnerata ineriartortinnissaanut  
pileraarutit allannortinneqarnissaat eqqarsaasorsorfigineqarsimanneginnersoq  
paaserusullugu apeqquteqaat aallaavigalugu Inatsisartut oqallinnissaannik siunnersuut.  
(Partii Naleqqap Inatsisartuni ilaasortaataitai)**

**Akissuteqaat**

(Ineqarnermut Attaveqaqatigiinnermullu Naalakkersuisoq)

Aallarniutigalugu Naalakkersuisuniit apeqquteqaat aallaavigalugu oqallinnissamat  
siunnersuut pillugu qujavugut.

Mittarfiliortiternissat 2015-imi aalajangiiffigineqarmata, Inatsisartuni ilaasortat tamarmik,  
ataaseq kisimi pinnani akuersipput. Taakkununga Inuit Ataqatigiinni aamma Partii  
Naleqqami, partiini illuatungiliuttuusuni maanna siulittaasuusut ilaapput.

Apeqquteqaat aallaavigalugu oqallinneq manna aammaloorluni Nuummi aamma Ilulissani  
nunanit tamalaanit mittarfiit kiisalu Qaqortumi nunap immikkoortuani mittarfiup  
sananeqarnissaannut, ingerlanneqarnissaannut aningaasalersorneqarnissaannullu killiliussatut  
piumasaqaatit pillugit Inatsisartut inatsisaanni nr. 4-mi, 22. november 2018-imeersumi  
tunngavigineqartunik eqikkaanissamat periarfissiivoq.

Partii Naleqqap Inatsisartuni ilaasortaataitaanit kissaatigineqarpoq, mittarfiliortiternermut  
anigaasaliisoqarnissaanut aalajangiineq isumaliutigeqqinneqassasoq.

Inatsisartut 2018-imi ukiakkut sanaartornermut inatsimmut aalajangiinissaat sioqqullugu  
piffissangaatsiaq misissueqqaarnermut atorneqarpoq. Ilaatigut inuiaqatigiinni, ingerlatsiner  
missingersuuteqarnermilu aningaasaqarnermik misissueqqissaarnerit annertuut,  
mittarfiliortiternissat ilumut aningaasaliiffiulluarnersut qulakkeerniarlugu tapersiisussat  
suliarineqarput.

Tassalu aningaasaqarnermik misissueqqissaarnerit taakku mittarfinnut nutaanut  
anigaasaliinitsigut isertitassanik sipaagassanillu arlalinnik tikkuussipput. Isertitat taakku  
takornariaqarnerup annertusinerani inuussutissarsiornermilu ineriartortitsiner  
mi

inuaqatigiinnut siuariartitseqataassapput. Taamatuttaaq mittarfiit pisortat aningaasaliissutaanni taamatullu angalasut ataasiakkaat akikinnerusunik bilitseqalernerisigut, pitsaanerusunillu angalariaaseqalernerisigut, sipaagassanik arlalissuarnik angusaqarnissamut pisooqataassapput. Taamaattumik mittarfiliortiternerit Qaqortoq, Nuuk aamma Ilulissat minillugit, Kalaallit Nunaata sinnera pilliutigalugu sanaartorneqarnerinik oqartoqarneranut Naalakkersuisut isumaqataangillat – akerlianik pisoqarmat. Mittarfiliortiternerit nuna tamakkerlugu annertusaaqataassapput ineriartortitseqataassallutillu.

Inatsisartut sanaartornermut inatsisissamik suliaqarnerannut akuersinerannullu ilanngullugu Naalagaaffiup mittarfiliortiternerimut aningaasalersueqataanissaa pillugu isumaqatigiissuteqarnerup kingunerisassai sukumiisumik oqallisigineqarput suliarineqarlutillu. Isumaqatigiissuteqarnermi mittarfiliortiternermi aningaasaqarneq inuaqatigiillu aningaasaqarnerannut sunniutissat ersarissumik pitsaanerulersinneqarput.

Inatsisip akuersissutigineqarnerata kingorna Kangerlussuup mittarfiata atorneqaannarnissaa pillugu Illersornissaqarfimmumt tunngaviusumik isumaqatigiissuteqartoqarpoq. Tassani Kalaallit Nunaanni mittarfinnik ilusilersuinissamut ingerlatsinissamullu Naalakkersuisut aalajangiinissamut akuersissutinillu tunniussinissamut inatsisitigut tunngavigisaat assortorneqarsinnaanngitsoq erseqqissaatigissavara. Naalakkersuisut inatsisinik atuutsitsinermi pissaaneqartutut silaannakkut angallassineq pillugu inatsimmi § 55, imm. 2 naapertorlugu ingerlatsinerimut akuersissummik tunniussisarput. Aalajangersagaq taanna aamma mittarfiit pillugit Inatsisartut inatsisaanni itisiliiffigineqarsimavoq. Taanna Naalakkersuisut silaannakkut angallassinermik ingerlatsinerannut qitiuvoq, aammalu kikkut Illersornissaqarfiup tamanut ammasumik mittarfimmik ilusiliinissaanut ingerlatsinissaanullu piginnaatitsissummik tunineqarnissaannut apeqqummi qitiulluni. Piginnaatitsissut Naalakkersuisuni inissisimavoq.

Illersornissaqarfiup Kangerlussuup mittarfianik atuiinnarnissaanut tunngaviusumik isumaqatigiissut ilaasut angalasarnerannut misissueqqissaarnerit, inuaqatigiit aningaasaqarnerannut kingunerisassanik misissueqqissaarnerimut tunngavigineqartut inernerinik nikisitsinissaat naatsorsuutigineqanngilaq.

Najoqqutassani, 2018-imi ukiakkut mittarfiliortiternerit pillugit Inatsisartut suliaannut ilaatinneqartuni mittarfiit nutaat atulerpata, Kangerlussuarmi ilaasartut ikileriangaatsiartussaasut allassimavoq.

Nunaqarfimmumt takornariartartut siuariartinneqassappata, mittarfiit nutaat tassani akigineqarnissaat naatsorsuutigineqanngilaq, kisiannili qinigassat amerlinissaat, aammalu nunatsinni takornariaqarnerimut inuussutissarsiornermullu atugassarititaasuni assigiinngissutsit atorluarnissaat siunnerfigineqarpoq.

Taamaattumittaaq aamma erseqqissassallugu pingaaruteqarpoq, timmisartuutileqatigiiffiit niuernikkut tunngavissaqarfiusunut ilaasartullu timmisartorfissatut kissaatigisaannut timmisartuuserrusuttartussaammata. Taamaattumik Qaqortumi, Nuummi Ilulissanilu mittarfiliorniarpugut.

Tassalu inuiaqatigiinni aningaasaqarnermut kingunerisassanik naliliinermi Illersornissaqarfiup Kangerlussuarmi mittarfimmik atuiinnarnissaata mittarfiit ilusissaannut nutaanut sunniuteqarnerlunissaanut takussutissaqanngilaq. Akerlianik mittarfiit nutaat imminnut akilersinnaanissaannut qularutissaanngitsunik takussutissaqarpoq – aamma Kangerlussuup inuinnaat angallanneqarnerinut ammatiinnarneqarnerani.

Kangerlussuup ingerlanneqarnerata siunissami akisussaaffeqarfiusumik naleqqussarneqarsinnaasooq Naalakkersuisut aalajangiusimajuurpaat. Tamatumunnga atatillugu erseqqissaatigineqassaaq, mittarfinnut pingasunut nutaanut inatsimmut aalajangiinissamut tunngaviusut Illersornissaqarfiup Kangerlussuarmik atuiinnarsinnaanerannik mattussinngimmata.

Taamatut oqaaseqarluta Naalakkersuisuniit Inatsisartuni oqallinnissamut qilanaarpugut.